

## Quarta dumengia da Cureisma

*Jesus ha udiu ch'ei vevan catschau giuado el. Scuntraus cun el, ha el dumandau: Creias ti el Fegl dil carstgaun. Igl um ha rispundiu: Tgi eis ei, Signur? Di, per che jeu sappi crer enten el! Jesus ha detg: Ti has viu el; igl ei quel che plaيدا cun tei. Gn 9,35-37*

### Oraziun dil di

Diu fideivel, biars dils schabetgs dallas jamnas vergadas havein nus aunc buc ordinau. Biaras caussas van aunc a nus atras il tgau. Schenghegia a nus il ruaus da vegnir el clar cun nusez, da capir auters carstgauns e da dir gie a nossa veta senza haver tema. Gida nus dad esser il tempel per tiu spért e da schenghegiar la pasch in a lauter. Perquei rughein nus entras Jesus Cristus nies frar e Signur. Amen.

### **Lecziun ord la brev da s.Paul a quels dad Efesus: 5,8-14**

Inagada eras vus stgiradetgna, mo uss essas vus daventai glisch tras il Segner. Viandei pia sco affons dalla glisch! Il fretg dalla glisch ei numnadamein spir buontad, giustia e verdad. Examinei, tgei ch'ei plascheivel al Segner, e buca separticipai dallas ovras nunfritgeivlas dalla stgiradetgna, anzi demascrei ellas! Quei che certa gliud fa el zuppau, ston ins tut setur-pegar d'insumma numnar. Mo tut quei che vegn scuvretg, vegn sclariu dalla glisch. E tut quei che vegn sclariu, ei glisch.

Perquei vegn ei detg:

Sededesta, ti che dormas,

leva si dils morts,

e Cristus vegn ad illuminar tei

## **+ Ord il Evangeli sogn tenor s. Gion. 9,1.6-9.13-17.34-38**

Mond per via ha Jesus viu in um che fuva tschocs da naschientscha enneu. El ha spidau giun plaun; lu ha el fatg cun la spida ina maula, ha furschau quella sils egls al tschiec e detg ad el: 7Va e selava el puoz da Siloa! - translatau vul quei dir il Tarmess. El ei ius e selavaus e turnaus ch'el veseva.

8Ils vischins ed auters che vevan viu el pli baul a rugond schevan: Ei quei buc igl um che seseva e rugava? 9Zacons schevan: Igl ei quel. Auters manegiavan: Na, el mo semeglia quel.

13Lu han ei menau igl um ch'era staus tschocs tier ils farisès. 14Il di che Jesus veva fatg la maula ed aviert ils egls ad el, fuva in sabat. 15Era ils farisès han emparau, co el hagi survegniu la vesida. Igl um ha detg ad els: El ha furschau ina maula sin mes egls, lu sun jeu selavaus, ed ussa vesel jeu. 16Zacons dils farisès han manegiau: Quei carstgaun sa buc esser da Diu, perquei ch'el tegn buc il sabat. Auters denton han detg: Co sa in carstgaun puccont far talas enzennas? Aschia ha ei dau ina cuntraversa denter els. 17Cheu han ei aunc inaga dumandau il tschiec: Tgei dias ti dad el? El ha gie aviert ils egls a ti. Igl um ha dau per risposta: El ei in profet.

Els han rispundiu ad el: Ti eis naschius entirs ed entratgs en puccaus, e ti vul instruir nus! Lu han ei catschau giuado el.

35Jesus ha udiu ch'ei vevan catschau giuado el. Scuntraus cun el, ha el dumandau: Creias ti el Fegl dil carstgaun? 36Igl um ha rispundiu: Tgi eis ei, Signur? Di, per che jeu sappi crer enten el! 37Jesus ha detg: Ti has viu el; igl ei quel che plaida cun tei. 38E l'auter ha detg: Jeu creiel, Signur! ed ei sefiers giun plaun avon el.

**Evangeli da Niessegner Jesus Kristus. Laud a ti, Kristus**

## Supplicas

Jesus Cristus ei vegnius per purtar glisch, salit e confiart als carstgauns.

El meina nus ensemen, era sche nus stuein il mument tener dinstanza in da l'auter.-Tier el astgein nus vegnir cun nossas supplicas e rugar:

- Nus rughein per quels che piteschan sut la Corona-Pandemia:  
Per tut ils malsauns dil Covid19, ch'ei en spital e per tut quels ch'ei en curontina.  
Jesus Cristus, Spindrader e Salvader: *Nus rughein tei, exauda nus.*
- Per tut quels ch'ei activs el lur clamada ed ein malsegirs co ei va vinavon.  
Per patruns ed interpresas ch'ei en prighel d'existenza.  
Per tut quels ch'ei plein tema e sesentan periclitai.  
Jesus Cristus, Spindrader e Salvader: *Nus rughein tei, exauda nus.*
- Nus rughein per tut ils biars carstgauns ch'ei nunstunclenteivlamein en survetsch:  
Per tut quels che lavuran en praticas da miedis e spitals  
e s'engaschan pil beinstar dils pazients.  
Jesus Cristus, Spindrader e Salvader: *Nus rughein tei, exauda nus.*
- Per las dunnas ed ils umens che lavuran en negozis ed apotecas  
e segireschan a nus il provediment fundamental.  
Per tuts che lavuran en laboratoris sut pressiun per valetar ils tests  
e per perscrutar medicaments e vaccins.  
Jesus Cristus, Spindrader e Salvader: *Nus rughein tei, exauda nus.*
- Nus rughein per tuts cristifideivels ch'ei provocai en quei temps special,  
e per ils spirituals che sviluppeschon novas fuormas  
co carstgauns san parter lur cardientscha in cun l'auter.  
Per ils cartents, als quals la cuminonza dalla sontga messa manca.  
Per tut quels che assistan in l'auter e fan curascha in a l'auter.  
Jesus Cristus, Spindrader e Salvader: *Nus rughein tei, exauda nus.*
- Nur rughein per nusezzi:  
Per ils quitaus e basegns che accumpognan mintgin da nus en quei temps.  
- En in mument da silenzi patertgein nus vid quels ch'ei a nus il pli datier.

Jesus Cristus, ti schenghegias a nus tia grazia e tia intercessiun gest era en quei grev temps.

Persuenter engraziein e glorifichein nus tei

cun Diu, il Bab ed il Spért sogn oz tut ils dis da nossa veta ed en tutta perpetnadad. Amen.

### **Oraziun dils duns**

Diu fideivel, nus havein il desideri suenter carezia, nus encurin vias tier la pasch, nus lessan buc vegnir trumpai en nossa fidonza. En quella fiasta schenghegias ti a nus paun e vin sco tgierp e saung da nies Signur. Lai rinforzar els nossa cardientscha e nossa carezia. Perquei rughein nus entras Jesus Cristus nies frar e Signur. Amen.

### **Oraziun per la communion spirtala**

Miu Jesus, miu Messias, miu Salvader. Jeu creiel fermamein che ti eis presents el tutsogn sacrament digl altar. Jeu adurel tei en profund respect. Jeu carezel tei sur tut e mi`olma brama da saver prender si tei en miu cor.

Damai ch`jeu sai ussa buc prender si tei ella sontga communion, roghel jeu tei, neu spirtalmein en miu cor. Neu tier mei cun tia grazia sanctificonta. Jeu vi embratschar tei e vi s`unir cumplettamein cun tei.

O Jesus, lai maina tier ch`jeu s`allonteneschi da tei.

### **Oraziun finala**

Diu fideivel, nus engraziein a ti per il plaid che muossa a nus ina nova via, per la tschavera che nus festivein ensemen, per la benedicziun che ti lessas schenghegiar a nus. Lai buc nus persuls cu nus vein damondas sin las qualas nus anflein buc rispostas e cu nus duvrein curascha per ir in viers l`auter. Perquei rughein nus entras Jesus Cristus nies frar e Signur. Amen.

*Dieus benedeschi e protegi nus.*

*Dieus laschi tarlischar sia fatscha sur da vus e seigi misericurdeivels.*

*Dieus aulzi sia fatscha sur da vus e schenghegi pasch a vus.*

